

M0009941: French anatomical fugitive sheet showing a seated female figure

Publication/Creation

March 1947

Persistent URL

<https://wellcomecollection.org/works/mfd84sp8>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

ANATOMIE TRESVtile POVR CON- GNOISTRE LES PARTIES INTERIEVRES DE LA FEMME, ET LA SITVATION, FIGVRE, NOMBRE ET POSITION D'ELLE.

A
¶ LE CERVEAV de sa nature est froid & humide, duquel la composition est diuisee en deux parties, c'est a sçauoir en l'interieure & posterieure.

B
¶ LE Poulmon est plein d'arteres, & composé de l'artere veneuse, & de l'artere, laquelle on appelle en Latin *Aspera artera*, instrument que nature a fait pour respirer. Les conduits & canaux duquel s'ilz sont estoupés p' humeurs espesses, & viscules, ou par intemperance refrigeres, procedent beaucoup de maladies, come toux: vlcération de poulmón, extenuation & megreté de corps, inflammation de poulmons, pleuresies, desquelles maladies le corps de l'homme est gradement consumé, d'auantage toutes sortes de maladies, qui viennent principalement, de fluxions, bilieuses, salées, ou de routes deux melées.

C
¶ LE Diafragme, est vne membrane nerveuse, contenant ce qui est compris dedans le thorax, autrement appelé ventre superieur: separant les entrailles qui sont dessous ledit ventre superieur.

D
¶ LE FOYE est plein de veines, chault, fontaine des operations naturelles, plain de sang, & premierelement fait la coction du sang, & par son touchement aide la coction qui se fait au ventricule, de quoy redolent trois especes d'excrement: la premiere est, la cholere amere qui coule & chet en la vésicle, qui est adhérente au Foye. La seconde, est la melancolie, qui se distille & descend en la rate. Les Reins attirent le troisieme, & le purgent en la vésicle.


E
¶ Parmi les entrailles apparoissent deux conduits, qui sortent & s'elieuent, par lesquels l'enfant en la matrice s'attire & se distribue l'aliment qui luy est necessaire.

F
¶ Les Reins sont chaults, & secs, composés de chair subtile, & contiennent vn excrement humide, ainsi come vne fosse: ou tranchée, qu'on fait pour escouler les eaux: lequel excrement lesdicts Reins expurgent, quant besoing est en la vésicle de l'vrine, par petits tuyaux, que representent vn long col, ou vne petite langue estroictée.

G
¶ D'auantage, vers les costés, au fond de la matrice d'un costé & d'autre sont situés les couillons de la femme, & recoyuent semblable circonvolution, que les couillons du male, mais ilz sont beaucoup plus petits que ceulx du male.

H
¶ LA Vésicle est vne partie designée à receuoir l'excrement, en laquelle les Reins comme dedens vne bouteille par les vaisseaux: qui portent la semence, lesquels prennent leur origine de la teste & partie superieure du couillon & vont à la nature de la femme.

I
¶ Le Cœur est le commencement & origine de la chaleur vitale, & de la vie aussi, duquel le sang & aussi l'esprit vital en sort, c'est à dire, le sang spirituel.



K
¶ La Region des costés sous le ventricule, des Grecs est appelée *hypochondria*, mais come vn mot que à plusieurs significacions, veult dire aussi les entrailles interieures froides: & humides arteres, desquelles la faculté est de poulcer & aussi les nerfs, qui sont de leur nature froids, & signifie aussi vne chair enflée & spongieuse, come est le poulmon & la rate, mais le sang des entrailles aucunement se mue en lait: ainsi appelé plein de ius.

L
¶ Le ventricule est l'instrument accommodé à exciter l'appetit, & de faire la coction des viandes, semblable à vn pot qui bout, durant le temps qu'il fait la coction, duquel l'aliment apres qu'il est engendré, est porté au foye, du foye le sang est distribué aux autres parties du corps.

M
¶ LA Rate, est vne partie des entrailles, située à la partie fenestre de l'animal, laquelle on appelle *palechyma*, c'est à dire, effusion d'humours autrement vne assemblée d'humours especes & caillées, composée d'une chair rare & lache: en maniere d'esponge, afin que plus facilement elle attire du foye & retienne en foy les humeurs crasses & espesses, dont procede souuentefois vne maladie, qu'on appelle vulgairement douleur de Rate.

N
¶ Le Flux de sang qui viennent aux femmes par chascun mois, procedent du foye au commencement peu à peu, & come par intervalle de tēps iusques à ce qu'ilz soyent venus aux petits vaisseaux qui sont sur le premier commencement & origine du col de la matrice, lesquels flux de sang ces vaisseaux voident à grande abondance comme si c'estoit vn conduit ouuert, ainsi qu'il appert en ceste figure.

O
¶ La Matrice est charneuse: mais p' le dedans plus charneuse, en laquelle est receu l'enfant, dessous laquelle ya vne petite vésicle adhérente, en laquelle le flux qui viēt aux femmes est digéré, lequel ainsi espars, ceste petite vésicle le void par le col de la matrice, quand est besoing, mais cela se fait apres qu'il est assemblé des excremens inutiles, qui se sont delachés de par tout le corps, principalement du Foye.

P
¶ EN ceste partie que lon appelle le trou du Cul, ya aucunes veines qui ouurent leur orifice, lesquelles en temps certain espurgent & reiectent du corps vn sang espes & melancholique duquel se font les hemorrhoides, c'est à dire, effluxion de sang, desquelles apres qu'elles ont induit & prins vne intemperance vicieuse lon est aptes griuement malade, tout ainsi comme de la maladie de la matrice, en le seing & capacité interieure de laquelle de tous costés s'assemblent deux petits vaisseaux, qui s'ouurent ça & là, & viennent de la veine en vulgaire appelée *Cave*, laquelle se couille & traine en bas par dessus l'os de l'eschine, & ces deux vaisseaux estans tous deux ensemble, viennent iusques à la capacité de la matrice, vn à la partie dextre, l'autre à la fenestre, laquelle chose demonstre plus appertement ceste figure icy escripte.